

01

陇头水

文镜秘府云。刘氏云。吴人徐陵。东南之秀。所作文笔。未曾犯声。唯横吹云云。亦是通人之弊。案此诗文苑英华作张正见。今两存之。

陇头流水急，水急行难渡。半入隗嚣营，傍侵酒泉路。

心交赠宝刀，小妇裁纨素。欲知别家久，戎衣今已故。

02

折杨柳

袅袅河堤树，依依魏主营。江陵有旧曲，洛下作新声。

妾对长杨苑，君登高柳城。春还应共见，荡子太无情。

03

走笔戏书应令诗

此日乍殷勤，相嫌不如春。今宵花烛泪，非是夜迎人。

舞席秋来卷，歌筵无数尘。曾经新代故，那恶故迎新。

片月窥花簾，轻寒入锦巾。秋来应瘦尽，偏自著腰身。

04

春情诗

风光今旦动，雪色故年残。薄夜迎新节，当垆却晚寒。
奇香分细雾，石炭捣轻纨。竹叶裁衣带，梅花奠酒盘。
年芳袖里出，春色黛中安。欲知迷下蔡，先将过上兰。

05

奉和咏舞诗

十五属平阳，因来入建章。
主家能教舞，城中巧画妆。
低鬟向绮席，举袖拂花黄。
烛送空回影，衫传篋里香。
当由好留客，故作舞衣长。

06

山斋诗

桃源惊往客，鹤峤断来宾。

复有风云处，萧条无俗人。

山寒微有雪，石路本无尘。

竹径蒙笼巧，茅斋结构新。

烧香披道记，悬镜厌山神。

砌水何年溜，檐桐几度春。

云霞一已绝，宁辨汉将秦。

07

秋日别庾正员诗

征途愁转旆，连骑惨停镳。朔气凌疏木，江风送上潮。

青雀离帆远，朱鸢别路遥。唯有当秋月，夜夜上河桥。

08

内园逐凉

昔有北山北，今余东海东。纳凉高树下，直坐落花中。

狭径长无迹，茅斋本自空。提琴就竹筱，酌酒劝梧桐。